

# Lesson 1

## *A Few Proverbs*

Text #1

知命者不怨天，知己者不怨人。

Text #2

禍生於欲得，福生於自禁。聖人以心導耳目，小人以耳目導心。

Text #3

爲善者天報以德。爲不善者天報以禍。

## Lesson 2

### *Yet More Proverbs*

Text #1

君子有終身之憂，而無一朝之患。順道而行，循理而言。喜不加易，怒不加難。

Text #2

天下失道，而後仁義生焉。國家不治，而後孝子生焉。民爭不分，而後慈惠生焉。道逆時反，而後權謀生焉。

## Lesson 3

### *Yet One More Proverb*

萬物得其本者生，百事得其道者成。道之所在，天下歸之。德之所在，天下貴之。仁之所在，天下愛之。義之所在，天下畏之。屋漏者，民去之。水淺者，魚逃之。樹高者，鳥宿之。德厚者，士趨之。有禮者，民畏之。忠信者，士死之。

## Lesson 4

### *Guan Zhong Shows Up Late*

齊桓公爲大臣具酒，期以日中。管仲後至。桓公舉觴以飲之。管仲半棄酒。桓公曰：「期而後至，飲而棄酒。於禮可乎？」管仲對曰：「臣聞：酒入舌出。舌出者言失，言失者身棄。臣計棄身不如棄酒。」桓公笑曰：「仲父起就坐！」

## Lesson 5

### *Master Zeng Refuses a City*

曾子衣弊衣以耕。魯君使人往致邑焉，曰：「請以此修衣。」曾子不受。反，復往，又不受。使者曰：「先生非求於人，人則獻之。奚爲不受？」曾子曰：「臣聞之：『受人者畏人，予人者驕人。』縱君有賜，不我驕也，我能勿畏乎？」終不受。孔子聞之曰：「參之言，足以全其節也。」

## Lesson 6

*Here We Go Round the Mulberry Bush*

趙簡子舉兵而攻齊，令軍中有敢諫者罪至死。披甲之士名曰公盧，望見簡子大笑。簡子曰：「子何笑？」對曰：「臣乃有宿笑。」簡子曰：「有以解之則可。無以解之則死。」對曰：「當桑之時，臣鄰家夫與妻俱之田。見桑中女，因往追之，不能得。還反，其妻怒而去之。臣笑其曠也。」簡子曰：「今吾伐國失國，是吾曠也。」於是罷師而歸。

## Lesson 7

### *He Calls the Tune*

伯牙子鼓琴，鍾子期聽之。方鼓而志在太山。鍾子期曰：「善哉乎鼓琴！巍巍乎若太山。」少選之間，而志在流水。鍾子期復曰：「善哉乎鼓琴！湯湯乎若流水。」鍾子期死，伯牙破琴絕弦，終身不復鼓琴，以爲世無足爲鼓琴者。非獨鼓琴若此也，賢者亦然。雖有賢者，而無以接之，賢者奚由盡忠哉？驥不自至千里者，待伯樂而後至也。

## Lesson 8

### *Duke Mu Forgives the Horse-Eaters*

秦穆公嘗出而亡其駿馬，自往求之。見人已殺其馬，方共食其肉。穆公謂曰：「是吾駿馬也！」諸人皆懼而起。穆公曰：「吾聞食駿馬肉不飲酒者殺人。」即以次飲之酒。殺馬者皆慚而去。居三年，晉攻秦穆公圍之。往時食馬肉者相謂曰：「可以出死報食馬得酒之恩矣！」遂潰圍。穆公卒得以解難勝晉，獲惠公以歸。此德出而福反也。

## Lesson 9

### *Mizi Xia Loses Favor*

彌子瑕愛於衛君。衛國之法，竊駕君車罪刖。彌子瑕之母疾，人聞，夜往告之。彌子瑕擅駕君車而出。君聞之，賢之，曰：「孝哉！爲母之故，犯刖罪哉！」君遊果園。彌子瑕食桃而甘，不盡而奉君。君曰：「愛我而忘其口味！」及彌子瑕色衰而愛弛，得罪於君。君曰：「是故嘗矯駕吾車，又嘗食我以餘桃！」故子瑕之行，未必變初也。前見賢，後獲罪者，愛憎之生變也。

## Lesson 10

### *Environment, Not Heredity*

晏子將使楚，楚王聞之，謂左右曰：「晏嬰，齊之習辭者也，今方來，吾欲辱之，何以也？」左右對曰：「爲其來也，臣請縛一人，過王而行，王曰：『何爲者也？』對曰：『齊人也。』王曰：『何坐？』曰：『坐盜。』」晏子至，楚王賜晏子酒，酒酣，吏二縛一人詣王，王曰：「縛者曷爲者也？」對曰：「齊人也，坐盜。」王視晏子曰：「齊人固善盜乎？」晏子避席對曰：「嬰聞之，橘生淮南則爲橘，生于淮北則爲枳，葉徒相似，其實味不同。所以然者何？水土異也。今民生長于齊不盜，入楚則盜，得無楚之水土使民善盜耶？」

## Lesson II

### *Assassin-Retainers: 曹沫*

曹沫者，魯人也，以勇力事魯莊公。莊公好力，曹沫爲魯將，與齊戰，三敗北。魯莊公懼，乃獻遂邑之地以和，猶復以爲將。齊桓公許與魯會于柯而盟。桓公與莊公既盟於壇上，曹沫執匕首劫齊桓公。桓公左右莫敢動，而問曰：「子將何欲？」曹沫曰：「齊強魯弱，而大國侵魯，亦已甚矣。今魯城壞，即壓齊境！君其圖之！」桓公乃許盡歸魯之侵地。既已言，曹沫投其匕首，下壇，北面就群臣之位，顏色不變，辭令如故。桓公怒，欲倍其約。管仲曰：「不可！夫貪小利以自快，棄信於諸侯，失天下之援。不如與之。」於是桓公乃遂割魯侵地。曹沫三戰所亡地，盡復予魯。

## Lesson 12

### *Assassin-Retainers: 專諸 (I)*

其後百六十有七年而吳有專諸之事。專諸者，吳堂邑人也。伍子胥之亡楚而如吳也，知專諸之能。伍子胥既見吳王僚，說以伐楚之利。吳公子光曰：「彼伍員父兄皆死於楚，而員言伐楚。欲自爲報私讐也，非能爲吳。」吳王乃止。伍子胥知公子光之欲殺吳王僚，乃曰：「彼光將有內志，未可說以外事。」乃進專諸於公子光。光之父曰吳王諸樊。諸樊弟三人，次曰餘祭，次曰夷昧，次曰季子札。諸樊知季子札賢而不立太子，以次傳三弟，欲卒致國于季子札。諸樊既死，傳餘祭。餘祭死，傳夷昧。夷昧死，當傳季子札。季子札逃不肯立。吳人乃立夷昧之子僚爲王。公子光曰：「使以兄弟次邪，季子當立。必以子乎，則光真適嗣，當立。」故嘗陰養謀臣以求立。光既得專諸，善客待之。

## Lesson 13

### *Assassin-Retainers: 專諸 (2)*

九年而楚平王死。春，吳王僚欲因楚喪使其二弟公子蓋餘屬庸將兵圍楚之潛。使延陵季子於晉，以觀諸侯之變。楚發兵，絕吳將蓋餘屬庸路，吳兵不得還。於是公子光謂專諸曰：「此時不可失。不求，何獲？且光真王嗣，當立。季子雖來，不吾廢也。」專諸曰：「王僚可殺也！母老子弱，而兩弟將兵伐楚。楚絕其後。方今吳外困於楚，而內空無骨鯁之臣。是無如我何。」公子光頓首曰：「光之身，子之身也。」四月丙子，光伏甲士於窟室中，而具酒請王僚。王僚使兵陳自宮至光之家。門戶階陛左右，皆王僚之親戚也。夾立侍，皆持長鋏。酒既酣，公子光詳爲足疾，入窟室中，使專諸置匕首魚炙之腹中而進之。既至王前，專諸擊魚，因以匕首刺王僚，王僚立死，左右亦殺專諸。王人擾亂，公子光出其伏甲以攻王僚之徒，盡滅之。遂自立爲王，是爲闔閭。闔閭乃封專諸之子以爲上卿。

## Lesson 14

### *Assassin-Retainers: 豫讓 (1)*

其後七十餘年而晉有豫讓之事。豫讓者，晉人也。故嘗事范氏及中行氏，而無所知名。去而事智伯，智伯甚尊寵之。及智伯伐趙襄子，趙襄子與韓魏合謀滅智伯，滅智伯之後而三分其地。趙襄子最怨智伯，漆其頭以爲飲器。豫讓遁逃山中，曰：「嗟乎！士爲知己者死，女爲說己者容。今智伯知我，我必爲報讐而死，以報智伯，則吾魂魄不愧矣！」乃變名姓爲刑人，入宮塗廁中，挾匕首，欲以刺襄子。襄子如廁，心動，執問塗廁之刑人，則豫讓。內持刀兵，曰：「欲爲智伯報仇！」左右欲誅之，襄子曰：「彼義人也。吾謹避之耳。且智伯亡無後，而其臣欲爲報仇，此天下之賢人也。」卒釋去之。居頃之，豫讓又漆身爲厲，吞炭爲啞，使形狀不可知。行乞於市，其妻不識也。行見其友，其友識之，曰：「汝非豫讓邪？」曰：「我是也。」其友爲泣曰：「以子之才，委質而臣事襄子，襄子必近幸子。近幸子，乃爲所欲，顧不易邪？何乃殘身苦形，欲以求報襄子，不亦難乎？」豫讓曰：「既已委質臣事人，而求殺之，是懷二心以事其君也。且吾所爲者極難耳。然所以爲此者，將以愧天下後世之爲人臣懷二心以事其君者也。」

## Lesson 15

### *Assassin-Retainers: 豫讓 (2)*

既去，頃之，襄子當出，豫讓伏於所當過之橋下。襄子至橋，馬驚。襄子曰：「此必是豫讓也！」使人問之，果豫讓也。於是襄子乃數豫讓曰：「子不嘗事范中行氏乎？智伯盡滅之，而子不爲報讎，而反委質，臣於智伯。智伯亦已死矣，而子獨何以爲之報讎之深也？」豫讓曰：「臣事范中行氏，范中行氏皆眾人遇我，我故眾人報之。至於智伯，國士遇我，我故國士報之。」襄子喟然歎息而泣曰：「嗟乎豫子！子之爲智伯，名既成矣，而寡人赦子亦已足矣。子其自爲計！寡人不復釋子。」使兵圍之。豫讓曰：「臣聞明主不掩人之美，而忠臣有死名之義。前君已寬赦臣，天下莫不稱君之賢。今日之事，臣固伏誅。然願請君之衣而擊之焉，以致報讎之意，則雖死不恨。非所敢望也。敢布腹心。」於是襄子大義之，乃使使持衣與豫讓。豫讓拔劍三躍而擊之，曰：「吾可以下報智伯矣！」遂伏劍自殺。死之日，趙國志士聞之，皆爲涕泣。

## Lesson 16

### *Assassin-Retainers: 爳政 (I)*

其後四十餘年而軻有聶政之事。聶政者，軻深井里人也。殺人避仇，與母姊如齊，以屠爲事。久之，濮陽嚴仲子事韓哀侯，與韓相俠累有隙。嚴仲子恐誅，亡去游，求人可以報俠累者，至齊。齊人或言聶政勇敢士也，避仇隱於屠者之間。嚴仲子至門請，數反，然後具酒自觴聶政母前。酒酣，嚴仲子奉黃金百鎰，前爲聶政母壽。聶政驚怪其厚，固謝嚴仲子。嚴仲子固進，而聶政謝曰：「臣幸有老母。家貧，客游以爲狗屠，可以旦夕得甘毳以養親。親供養備，不敢當仲子之賜。」嚴仲子辟人，因爲聶政言曰：「臣有仇，而行游諸侯眾矣。然至齊，竊聞足下義甚高，故進百金者，將用爲大人廳糲之費，得以交足下之驩。豈敢以有求望邪？」聶政曰：「臣所以降志辱身居市井屠者，徒幸以養老母。老母在，政身未敢以許人也。」嚴仲子固讓，聶政竟不肯受也。然嚴仲子卒備賓主之禮而去。

## Lesson 17

### *Assassin-Retainers: 爳政 (2)*

久之，竊政母死。既已葬，除服，竊政曰：「嗟乎！政乃市井之人，鼓刀以屠。而嚴仲子乃諸侯之卿相也，不遠千里，枉車騎而交臣。臣之所以待之，至淺鮮矣。未有大功可以稱者，而嚴仲子奉百金爲親壽。我雖不受，然是者徒深知政也。夫賢者以感忿睚眦之意而親信窮僻之人，而政獨安得默然而已乎！且前日要政，政徒以老母，老母今以天年終，政將爲知己者用。」乃遂西至濮陽。見嚴仲子曰：「前日所以不許仲子者，徒以親在。今不幸而母以天年終。仲子所欲報仇者爲誰？請得從事焉。」嚴仲子具告曰：「臣之仇韓相俠累。俠累又韓君之季父也，宗族盛多，居處兵衛甚設。臣欲使人刺之，眾終莫能就。今足下幸而不棄。請益其車騎壯士，而爲足下輔翼者。」竊政曰：「韓之與衛相去，中間不甚遠。今殺人之相，相又國君之親，此其勢不可以多人。多人，不能無生得失。生得失則語泄。語泄，是韓舉國而與仲子爲讎。豈不殆哉！」遂謝車騎人徒。

## Lesson 18

### *Assassin-Retainers: 爳政 (3)*

竊政乃辭，獨行，杖劍至韓。韓相俠累方坐府上，持兵戟而衛侍者甚眾。竊政直入上階，刺殺俠累。左右大亂，竊政大呼，所擊殺者數十人。因自皮面決眼，自屠出腸，遂以死。韓取竊政屍暴於市，購問。莫知誰子。於是韓購縣之，有能言殺相俠累者予千金。久之，莫知也。政姊榮聞人有刺殺韓相者，賊不得，國不知其名姓，暴其屍而縣之千金，乃於邑曰：「其是吾弟與？嗟乎！嚴仲子知吾弟！」立起如韓之市，而死者果政也。伏屍，哭極哀，曰：「是軻深井里所謂竊政者也。」市行者諸眾人皆曰：「此人暴虐吾國相，王購縣其名姓千金。夫人不聞與？何敢來識之也！」榮應之曰：「聞之。然政所以蒙污辱，自棄於市販之間者，爲老母幸無恙，妾未嫁也。親既以天年下世，妾已嫁夫，嚴仲子乃察舉吾弟困污之中而交之。澤厚矣，可奈何？士固爲知己者死。今乃以妾尚在之故，重自刑以絕從。妾其奈何畏歿身之誅，終滅賢弟之名？」大驚韓市人。乃大呼天者三，卒於邑悲哀而死政之旁。晉楚齊衛聞之，皆曰：「非獨政能也，乃其姊亦烈女也！鄉使政誠知其姊無濡忍之志，不重暴骸之難，必絕險千里以列其名，姊弟俱僇於韓市者，亦未必敢以身許嚴仲子也。嚴仲子亦可謂知人能得士矣！」

## Lesson 19

### 周幽王后褒姒

褒姒者，童妾之女，周幽王之后也。初，夏之衰也，褒人之神化爲二龍，同於王庭而言曰：「余，褒之二君也。」夏后卜殺之與去，莫吉。卜請其漦，藏之而吉。乃布幣焉，龍忽不見，而藏漦檮中，乃置之郊，至周莫之敢發也。及周厲王之末，發而觀之，漦流於庭，不可除也。王使婦人裸而謡之，化爲玄蛇，入後宮。宮之童妾未齎而遭之，既笄而孕，當宣王之時產，無夫而乳。懼而棄之。先是有童謠曰：「檮弧箕服，寔亡周國。」宣王聞之。後有人夫妻賣檮弧箕服之器者，王使執而戮之。夫妻夜逃，聞童妾之女遭棄而夜號，哀而取之，遂竄於褒。長而美好，褒人妬有獄，獻之以贖。幽王受而嬖之，遂釋褒妬，故號曰褒姒。既生子伯服，幽王乃廢后申侯之女，而立褒姒爲后，廢太子宜臼，而立伯服爲太子。幽王惑於褒姒，出入與之同乘，不卹國事，驅馳弋獵不時，以適褒姒之意。飲酒流湎，倡優在前，以夜續晝。褒姒不笑，幽王乃欲其笑，萬端，故不笑。幽王爲烽燧大鼓，有寇至則舉。諸侯悉至，而無寇，褒姒乃大笑。幽王欲悅之，數爲舉烽火。其後不信，諸侯不至。忠諫者誅，唯褒姒言是從，上下相諛，百姓乖離。申侯乃與縕、西夷犬戎共攻幽王。幽王舉烽燧徵兵，莫至。遂殺幽王於驪山之下，虜褒姒，盡取周賂而去。於是諸侯乃即申侯而共立故太子宜臼，是爲平王。自是之後，周與諸侯無異。詩云：「赫赫宗周，褒姒滅之。」此之謂也。頌曰：「褒神龍變，寔生褒姒。興配幽王，廢后太子。舉烽致兵，笑寇不至。申侯伐周，果滅其祀。」

## Lesson 20

### 鄒孟軻母 (I)

鄒孟軻之母也，號孟母。其舍近墓。孟子之少也，嬉遊爲墓間之事，踴躍築埋；孟母曰：「此非吾所以居處子也。」乃去，舍市傍。其嬉戲爲賈人銜賣之事；孟母又曰：「此非吾所以居處子也。」復徙舍學宮之傍。其嬉遊乃設俎豆，揖讓進退。孟母曰：「真可以居吾子矣。」遂居之。及孟子長，學六藝，卒成大儒之名。君子謂：「孟母善以漸化。」詩云：「彼姝者子，何以予之？」此之謂也。孟子之少也，既學而歸。孟母方績，問曰：「學何所至矣？」孟子曰：「自若也。」孟母以刀斷其織。孟子懼而問其故。孟母曰：「子之廢學，若吾斷斯織也。夫君子學以立名，問則廣知。是以居則安寧，動則遠害。今而廢之，是不免於廝役，而無以離於禍患也。何以異於織績而食：中道廢而不爲，寧能衣其夫子而長不乏糧食哉？女則廢其所食，男則墮於修德，不爲竊盜，則爲虜役矣。」孟子懼，旦夕勤學不息，師事子思，遂成天下之名儒。君子謂：「孟母知爲人母之道矣。」詩云：「彼姝者子，何以告之？」此之謂也。

## Lesson 21

### 鄒孟軻母 (2)

孟子既娶，將入私室，其婦袒而在內。孟子不悅，遂去不入。婦辭孟母，而求去曰：「妾聞夫婦之道，私室不與焉。今者妾竊墮在室，而夫子見妾，勃然不悅，是客妾也。婦人之義，蓋不客宿。請歸父母。」於是孟母召孟子而謂之曰：「夫禮將入門，問孰存，所以致敬也。將上堂，聲必揚，所以戒人也。將入戶，視必下，恐見人過也。今子不察於禮，而責禮於人，不亦遠乎？」孟子謝，遂留其婦。君子謂：「孟母知禮，而明於姑母之道。」孟子處齊，而有憂色。孟母見之曰：「子若有憂色，何也？」孟子曰：「不敢。」異日閒居，擁楹而歎。孟母見之曰：「鄉見子有憂色，曰『不敢也』。今擁楹而歎，何也？」孟子對曰：「軻聞之：君子稱身而就位，不爲苟得而受賞，不貪榮祿。諸侯不聽則不達其上，聽而不用則不踐其朝。今道不用於齊，願行而母老，是以憂也。」孟母曰：「夫婦人之禮，精五飯，幕酒漿，養舅姑，縫衣裳而已矣，故有閨內之修而無境外之志。易曰：『在中饋，无攸遂。』詩曰：『無非無儀，惟酒食是議。』以言婦人無擅制之義，而有三從之道也。故年少則從乎父母，出嫁則從乎夫，夫死則從乎子，禮也。今子成人也，而我老矣，子行乎子義，吾行乎吾禮。」君子謂：「孟母知婦道。」詩云：「載色載笑，匪怒伊教。」此之謂也。頌曰：「孟子之母，教化列分。處子擇藝，使從大倫。子學不進，斷機示焉。子遂成德，爲當世冠。」

## Lesson 22

### 孟子梁惠王上 (*Section 1*)

孟子見梁惠王，王曰：「叟不遠千里而來，亦將有以利吾國乎？」孟子對曰：「王何必曰利？亦有仁義而已矣。王曰：『何以利吾國？』，大夫曰：『何以利吾家？』，士庶人曰：『何以利吾身？』，上下交征利，而國危矣。萬乘之國，弑其君者必千乘之家。千乘之國，弑其君者必百乘之家。萬取千焉，千取百焉，不爲不多矣。苟爲後義而先利，不奪不饜。未有仁而遺其親者也；未有義而後其君者也。王亦曰仁義而已矣。何必曰利？」

## Lesson 23

### 孟子梁惠王上 (*Section 3*)

梁惠王曰：「寡人之於國也，盡心焉耳矣。河內凶，則移其民於河東，移其粟於河內。河東凶亦然。察鄰國之政，無如寡人之用心者。鄰國之民不加少，寡人之民不加多，何也？」孟子對曰：「王好戰，請以戰喻。填然鼓之，兵刃既接，棄甲曳兵而走。或百步而後止，或五十步而後止。以五十步笑百步，則何如？」曰：「不可。直不百步耳，是亦走也。」曰：「王如知此，則無望民之多於鄰國也。不違農時，穀不可勝食也。數罟不入洿池，魚鼈不可勝食也。斧斤以時入山林，材木不可勝用也。穀與魚鼈不可勝食，材木不可勝用，是使民養生喪死無憾也。養生喪死無憾，王道之始也。五畝之宅，樹之以桑，五十者可以衣帛矣。雞豚狗彘之畜，無失其時，七十者可以食肉矣。百畝之田，勿奪其時，數口之家可以無飢矣。謹庠序之教，申之以孝悌之義，頒白者不負戴於道路矣。七十者衣帛食肉，黎民不飢不寒，然而不王者，未之有也。狗彘食人食而不知檢；塗有餓殍而不知發。人死，則曰：『非我也，歲也。』是何異於刺人而殺之曰：『非我也，兵也？』王無罪歲，斯天下之民至焉。」

## Lesson 24

### 孟子梁惠王上 (*Section 6*)

孟子見梁襄王，出語人曰：「望之不似人君，就之而不見所畏焉。卒然問曰：『天下惡乎定？』吾對曰：『定乎一。』『孰能一之？』對曰：『不嗜殺人者能一之。』『孰能與之？』對曰：『天下莫不與也。王知夫苗乎？七八月之間旱，則苗槁矣。天油然作雲，沛然下雨，則苗勃然興之矣。其如是，孰能禦之？今夫天下之人牧，未有不嗜殺人者也。如有不嗜殺人者，天下之民皆引領而望之矣。誠如是也，民歸之由水之就下，沛然誰能禦之？』」

## Lesson 25

孟子梁惠王上 (*Section 7, Part 1*)

齊宣王問曰：「齊桓晉文之事，可得聞乎？」孟子對曰：「仲尼之徒，無道桓文之事者，是以後世無傳焉。臣未之聞也。無以，則王乎？」曰：「德何如則可以王矣？」曰：「保民而王，莫之能禦也。」曰：「若寡人者，可以保民乎哉？」曰：「可。」曰：「何由知吾可也？」曰：「臣聞之胡龁曰：『王坐於堂上，有牽牛而過堂下者，王見之，曰：「牛何之？」對曰：「將以釁鐘。」王曰：「舍之，吾不忍其觳觫，若無罪而就死地。」對曰：「然則廢釁鐘與？」曰：「何可廢也？以羊易之。』』不識有諸？」曰：「有之。」曰：「是心足以王矣。百姓皆以王爲愛也，臣固知王之不忍也。」王曰：「然，誠有百姓者。齊國雖褊小，吾何愛一牛？即不忍其觳觫，若無罪而就死地，故以羊易之也。」曰：「王無異於百姓之以王爲愛也，以小易大，彼惡知之？王若隱其無罪而就死地，則牛羊何擇焉？」王笑曰：「是誠何心哉？我非愛其財而易之以羊也，宜乎百姓之謂我愛也！」曰：「無傷也，是乃仁術也。見牛，未見羊也。君子之於禽獸也，見其生，不忍見其死，聞其聲，不忍食其肉。是以君子遠庖廚也。」王說曰：「詩云：『他人有心，予忖度之。』夫子之謂也！夫我乃行之，反而求之，不得吾心。夫子言之，於我心有戚戚焉。此心之所以合於王者，何也？」

## Lesson 26

孟子梁惠王上 (*Section 7, Part 2*)

曰：「有復於王者曰：『吾力足以舉百鈞，而不足以舉一羽；明足以察秋毫之末，而不見輿薪。』則王許之乎？」曰：「否。」「今恩足以及禽獸，而功不至於百姓者，獨何與？然則一羽之不舉，爲不用力焉；輿薪之不見，爲不用明焉。百姓之不見保，爲不用恩焉。故王之不王，不爲也，非不能也。」曰：「不爲者與不能者之形何以異？」曰：「挾太山以超北海，語人曰：『我不能』，是誠不能也。爲長者折枝，語人曰：『我不能』，是不爲也，非不能也。故王之不王，非挾太山以超北海之類也；王之不王，是折枝之類也。老吾老，以及人之老；幼吾幼，以及人之幼；天下可運於掌。詩云：『刑於寡妻，至於兄弟，以御于家邦。』言舉斯心，加諸彼而已。故推恩，足以保四海；不推恩，無以保妻子。古之人所以大過人者，無他焉，善推其所爲而已矣。今恩足以及禽獸，而功不至於百姓者，獨何與？權，然後知輕重；度，然後知長短。物皆然，心爲甚。王請度之！抑王興甲兵，危士臣，構怨於諸侯，然後快於心與？」王曰：「否，吾何快於是？將以求吾所大欲也。」曰：「王之所大欲可得聞與？」王笑而不言。曰：「爲肥甘不足於口與？輕煖不足於體與？抑爲采色不足視於目與？聲音不足聽於耳與？便嬖不足使令於前與？王之諸臣皆足以供之，而王豈爲是哉？」曰：「否，吾不爲是也。」

## Lesson 27

### 孟子梁惠王上 (Section 7, Part 3)

曰：「然則王之所大欲可知已。欲辟土地，朝秦楚，蒞中國，而撫四夷也。以若所爲，求若所欲，猶緣木而求魚也。」王曰：「若是其甚與？」曰：「殆有甚焉。緣木求魚，雖不得魚，無後災。以若所爲，求若所欲，盡心力而爲之，後必有災。」曰：「可得聞與？」曰：「鄒人與楚人戰，則王以爲孰勝？」曰：「楚人勝。」曰：「然則小固不可以敵大，寡固不可以敵眾，弱固不可以敵強。海內之地，方千里者九，齊集有其一；以一服八，何以異於鄒敵楚哉？蓋亦反其本矣。今王發政施仁，使天下仕者皆欲立於王之朝，耕者皆欲耕於王之野，商賈皆欲藏於王之市，行旅皆欲出於王之塗，天下之欲疾其君者皆欲赴愬於王；其若是，孰能禦之？」王曰：「吾惛，不能進於是矣。願夫子輔吾志，明以教我。我雖不敏，請嘗試之。」曰：「無恆產而有恆心者，惟士爲能。若民，則無恆產，因無恆心。苟無恆心，放辟邪侈，無不爲已。及陷於罪，然後從而刑之，是罔民也。焉有仁人在位，罔民而可爲也？是故明君制民之產，必使仰足以事父母，俯足以畜妻子，樂歲終身飽，凶年免於死亡，然後驅而之善；故民之從之也輕。今也制民之產，仰不足以事父母，俯不足以畜妻子，樂歲終身苦，凶年不免於死亡；此惟救死而恐不贍，奚暇治禮義哉？王欲行之，則盍反其本矣。五畝之宅，樹之以桑，五十者可以衣帛矣。雞豚狗彘之畜，無失其時，七十者可以食肉矣。百畝之田，勿奪其時，八口之家可以無飢矣。謹庠序之教，申之以孝悌之義，頒白者不負戴於道路矣。老者衣帛食肉，黎民不飢不寒，然而不王者，未之有也。」

## Lesson 28

### 孟子梁惠王下 (*Section 1*)

莊暴見孟子曰：「暴見於王，王語暴以好樂。暴未有以對也。」曰：「好樂何如？」孟子曰：「王之好樂甚，則齊國其庶幾乎！」他日見於王曰：「王嘗語莊子以好樂，有諸？」王變乎色曰：「寡人非能好先王之樂也。直好世俗之樂耳。」曰：「王之好樂甚，則齊其庶幾乎！今之樂，由古之樂也。」曰：「可得聞與？」曰：「獨樂樂，與人樂樂，孰樂？」曰：「不若與人。」曰：「與少樂樂，與眾樂樂，孰樂？」曰：「不若與眾。」「臣請爲王言樂。今王鼓樂於此。百姓聞王鐘鼓之聲，管籥之音，舉疾首蹙額而相告曰：『吾王之好鼓樂，夫何使我至於此極也？父子不相見，兄弟妻子離散！』今王田獵於此。百姓聞王車馬之音，見羽旄之美，舉疾首蹙額而相告曰：『吾王之好田獵，夫何使我至於此極也？父子不相見，兄弟妻子離散！』此無他，不與民同樂也。今王鼓樂於此。百姓聞王鐘鼓之聲，管籥之音，舉欣欣然有喜色而相告曰：『吾王庶幾無疾病與？何以能鼓樂也？』今王田獵於此。百姓聞王車馬之音，見羽旄之美，舉欣欣然有喜色而相告曰：『吾王庶幾無疾病與？何以能田獵也？』此無他，與民同樂也。今王與百姓同樂，則王矣！」

## Lesson 29

### 孟子告子上 (*Section 10*)

孟子曰。「魚，我所欲也。熊掌，亦我所欲也。二者不可得兼，舍魚而取熊掌者也。生，亦我所欲也。義，亦我所欲也。二者不可得兼，舍生而取義者也。生亦我所欲；所欲有甚於生者，故不爲苟得也。死亦我所惡；所惡有甚於死者，故患有所不辟也。如使人之所欲莫甚於生，則凡可以得生者何不用也？使人之所惡莫甚於死者，則凡可以辟患者何不爲也？由是則生而有不用也；由是則可以辟患而不爲也。是故所欲有甚於生者，所惡有甚於死者。非獨賢者有是心也；人皆有之。賢者能勿喪耳。一簞食，一豆羹：得之則生，弗得則死。嗟爾而與之，行道之人弗受。蹴爾而與之，乞人不屑也。萬鍾則不辨禮義而受之。萬鍾於我何加焉？爲宮室之美？妻妾之奉？所識窮乏者得我與？鄉爲身死而不受，今爲宮室之美爲之；鄉爲身死而不受，今爲妻妾之奉爲之；鄉爲身死而不受，今爲所識窮乏者得我而爲之。是亦不可以已乎？此之謂失其本心。」

## Lesson 30

### 孟子梁惠王下 (*Section 15*)

滕文公問曰：「滕，小國也，竭力以事大國，則不得免焉，如之何則可？」孟子對曰：「昔者大王居邠，狄人侵之，事之以皮幣，不得免焉，事之以犬馬，不得免焉，事之以珠玉，不得免焉。乃屬其耆老而告之曰：『狄人之所欲者，吾土地也。吾聞之也，君子不以其所以養人者害人。二三子何患乎無君？我將去之。』去邠，踰梁山，邑于岐山之下，居焉。邠人曰：『仁人也，不可失也。』從之者如歸市。或曰：『世守也，非身之所能爲也，效死勿去。』君請擇於斯二者。」